



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之二百九十四

咸豐九年己未九月丁丑諭軍機大臣等本日據袁甲三等  
奏大股逆匪撲擾三河現籌竭力堵禦一摺賊匪於退出盱  
眙後竄至三河南岸又向衡陽一帶搶船爭渡雖經水陸各  
軍擊退賊匪仍聚黎城金溝一帶與清淮相距甚近情形危  
急現派都司穆恆德等並遊擊德興管帶存城及所部各兵  
分赴衡陽及三河並於三河以南收集張得勝等潰敗兵勇  
洪湖北面添調團練二千名扼守將沿湖南岸船隻悉數調  
歸北岸布置均尚周妥勝保駐軍五河與該處相距較近設

使該逆抄出後路。清淮偶有疏虞。該大臣全軍亦必受困。著  
即嚴督張得勝等將屯撲三河之匪。實力勦洗。其孫葵心一  
股。聲稱取道睢甯以撲清淮。袁甲三等力難兼顧。並著勝保  
就近撥兵迎擊。毋令東竄。袁甲三即咨和春等攻勦天長。以  
牽制賊勢。並先就現有兵勇分投堵遏。會合勝保之兵并力  
夾擊。毋得稍有疏虞。將此由六百里各諭令知之。○又諭前  
因勝保翁同書兩處軍營需餉甚急。疊經諭令瑛榮等籌款  
分撥接濟。茲據翁同書奏稱。近接瑛榮來函。知勝保函會已  
專弁前赴河南截留山西陝西協撥翁同書軍營餉銀四萬  
兩等語。軍營餉需必須均勻分撥。方免貽誤。前經勝保奏明。

將山陝月餉就近撥歸翁同書軍營。河南月餉兩營分撥。現  
在翁同書一營缺餉已久。潁州一帶道路梗阻。專賴山陝河  
南源源接濟。勝保何得將山陝協餉全行截留。著瑛榮接奉  
此旨。將山陝協餉應撥翁同書軍營者。經過豫省時不得截  
歸勝保軍營。以昭平允。而顧大局。其豫省應解餉銀仍著均  
勻分撥。將此由五百里諭令知之。○又諭曹澍鍾奏大股逆  
匪圍逼省城。請飭催湖南援軍合力勦辦一摺。逆賊石達開  
經湖南官軍痛勦後。敗竄廣西。沿途裹脅勾結。不下十餘萬  
人。圍撲省城。雖經內外文武紳團嚴密堵禦。疊次截勦。殲斃  
甚多。惟賊眾兵單。不敷分布。所調赫勇等軍復因路途阻滯。

一時未能趕到。駱秉章前派蕭啟江、劉長佑兩軍赴援。現於興安靈川一帶為賊所阻。節節攻堅。未能長驅直進。桂林情形待援甚急。設有不虞。使該逆踞為巢穴。勦辦更難措手。著駱秉章飛催該二員迅速繞道前進。或再添撥重兵接應。毋稍遷延。并著曹澍鍾一面飛提楚軍。一面督率文武員弁極力守禦。以待援師。毋稍鬆勁。劉長佑、蕭啟江等軍俟入廣西地界。即著統歸曹澍鍾調遣。以一事權。將此由六百里各諭令知之。○幫辦軍務安徽巡撫翁同書奏。穎上所屬南召集一帶捻匪。難髮投誠。沙河以南亦漸悔罪安業。得旨。俟投誠者無懷反側。頑梗者漸可洗心。然後將在事出力員弁紳董。

擇尤保奏數員。以昭激勸。○以故成郡王載銳子鎮國將軍溥莊降襲貝勒。○以直隸按察使清盛為山東布政使。降山東布政使吳廷棟為直隸按察使。○以湖南常德協副將文明為陝西延綏鎮總兵官。○改鑄浙江嵊縣知縣印信。從巡撫胡興仁請也。○緩徵廣東清遠、英德、廣甯、德慶四會開建、靈山、七州縣被賊村莊新舊額賦。○戊寅諭內閣。官文奏守備受傷痊癒。請留營當差等語。都司銜守備李登闢前因礮傷左腕成廢。當降旨准其在籍食俸。茲據官文奏稱該員傷已平復。惟不能挽弓。至辦理營務乘騎接仗。並無妨礙。業經隨同李續宜在資西等處打仗出力。李登闢著准其留於李

續宜軍營隨同征勦。註銷在籍食俸原案。仍照例按班補用。其不能挽弓緣由。並著註冊。○又諭。毓泰等奏。兵米不敷。支放。請照例撥價採買一摺。熱河駐防官兵不敷米石。向由承德府暨各屬領價採買。交倉搭放。本年冬季。應放餉米不敷。支發。著直隸總督籌款撥給。熱河道飭屬買補。交倉。以供支放。毋誤兵糈。○諭軍機大臣等。本日降旨。授勞崇光為兩廣總督。者齡調任廣東巡撫。即赴新任。毋庸來京。粵東自勞崇光入城任事以後。疊據奏報。在城夷兵無多。民夷亦尚相安無事。惟天津勝仗。勞崇光入城時。尚未知悉。以為和議已成。故有入城之舉。現在暎咈二國能否就範。尚未可定。昨據何

桂清奏。探聞咈夷前與鄰國構兵。現已議和。撤回夷兵三千名。在香港口聽候消息。雖未知果否確實。而夷情詭譎。不可不防。前此柏貴在城。一舉一動。該夷有人伺察。文報皆須拆看。辦事不能自主。彼時尚有黃宗漢帶兵在外。遙為聲援。若督撫同入省城。為該夷所困。設有變動。無從脫身。何能辦理夷務。勞崇光既已入城。自未能無端離省。致啟該夷疑惑。著者齡行抵廣東境內。即派親信妥員。先入省城。面見勞崇光。密商。或以堵勒西匪為名。帶印出省。或勞崇光礙難抽身。即留者齡在外調度防勦事宜。相機密辦。不至受該夷挾制。牢籠。是為至要。至現在廣東省城。民夷是否相安。及夷人如何

舉動情形。並著耆齡會同勞崇光。詳細由驛馳奏。以紓廛念。將此由五百里諭知耆齡。並傳旨密諭勞崇光知之。○兩廣總督王慶雲因病解任。以廣東巡撫勞崇光為兩廣總督。調江西巡撫耆齡為廣東巡撫。以江西布政使惲光宸為巡撫。按察使毓科為布政使。候補按察使張敬修為江西按察使。○己卯諭內閣。有人奏廣西布政使蔣益澧貪鄙任性。債事殃民。自擊退平樂賊匪後。並不跟蹤追剿。轉赴荔波。致賊匪乘虛窺省。迨省城被圍。該藩司僅以疲病之兵千餘回援。本省錢糧及各省協濟餉需。均以養勇為名。諸多浮冒。遇有調發。則以賤值雇募充數。其隨營之賀縣團勇擊賊得力。該藩

司忌其立功。屏棄不用。坐擁厚貲。不發兵餉各等情。蔣益澧湖南布衣。朕因其帶勇剿賊。素稱勇敢。不數年間。疊次加恩。擢任藩司。宜如何感激圖報。乃近日志驕氣盈。舉措乖方。辜恩昧良。實出情理之外。本應從重懲辦。姑念其前此尚有戰功。著先行革去布政使。以道員降補。仍留廣西。交曹澍鍾差委。其侵吞兵餉。及遇賊退避各情節。並著該撫查明參奏。毋稍徇隱。○諭軍機大臣等。奕山那敷德奏勸捐軍械。請暫借庫款一摺。據稱黑龍江自咸豐二年以來。雖兩次修造軍器。經出征官兵攜赴軍營。為數甚多。擬添造弓一千張。梅鉞箭五萬枝。長矛六百桿。鳥槍六百桿。以資應用。現已派員勸諭。

省城旗營屯站。以及鋪戶商民捐資造辦。惟湊足尚需時日。擬豫指省城官兵欠餉。咸豐七年秋季俸餉。借支銀五千兩。俟出放此項俸餉時。按照所借數目扣還。現已發給銀二千二百七十餘兩。所欠二千七百餘兩。俟有解到之款。再行補發。所議尚屬可行。著特普欽。按照所奏。妥為辦理。並准其借動庫款。趕緊製造。事竣仍造冊報銷。以昭覈實。另摺奏。佐領額勒德慎。因病脫逃。尋覓無蹤等語。職官患病。何至乘夜脫逃。是否規避差使。或另有別情。著即通行各城。嚴密查拏。務獲革職審辦。毋任遠颺。將此諭令知之。○又諭。曹澍鍾奏。賊匪圍逼桂林省城。請飭催湖南援軍合勦。業經諭令駱秉章。

迅派蕭啟江等軍前往。並諭令曹澍鍾固守。以待援師。本日復據李載熙奏。楚匪竄粵。城圍方急。賊營自西南城外起。蔓延百餘里不絕。西南北三面。道路梗塞。文報不通。東路恃扒船捍禦。而十數里外。亦有賊蹤。柳州湘勇千餘。及另起志同軍。竄勇千餘。均為賊隔。此外別無可恃之兵。情形實屬非常危急。桂林一城。關繫全省大局。設令賊蹤闖入。勦辦更難措手。蕭啟江。劉長佑。兩軍據稱。已入粵境。而尚阻於興安靈川一帶。著駱秉章。飛催該二員。迅速設法。繞由間道前進。並添派重兵。竭力赴援。不致孤軍深入。方操勝算。勞崇光統轄兩粵。著派撥重兵。星馳援應。力解城圍。並須設法籌撥餉需。源

源接濟。毋令缺乏。曹澍鍾身任封圻。責無旁貸。著一面飛提  
楚軍。一面督率文武員弁。竭力守禦。以待援軍。至蔣益澧所  
部兵勇。著交新任臬司劉長佑統帶。責令迅速。勦賊。所有疲  
病各勇。即著劉長佑分別裁汰。以節經費。而肅戎行。將此由  
六百里各諭令知之。○又諭景瀄。特普欽奏。會籌保護漫山。  
藉杜夷人侵越一摺。綏芬烏蘇里等處山場。向禁居民潛往。  
地方空曠。以致俄夷人船得以闖入。該將軍等奏稱。漫山開  
採。需費較繁。惟令攬頭招募人夫。前往保護。聽其自謀生計。  
該處地廣山深。伐木。打牲。採菜。捕魚。均可獲利。明春並可布  
種口糧。以資接濟。似此厚集人力。漸壯聲威。夷人當不俟驅

逐而自退等語。以中國之曠土。居中國之民。人利之所在。自  
必羣相保衛。可杜夷人強占之計。不煩兵力。而足禦外侮。因  
地制宜。所籌不為無見。惟既議招募。自必多多益善。此項人  
夫。非盡馴良。設以聚集較眾。別生事端。亦屬可慮。况夷情詭  
詐。於該處人夫等。或餌之以利。或脅之以威。恐為該夷所用。  
亦不可不豫為防維。景瀄特普欽。現已催調攬頭。趕緊勸辦。  
著再悉心籌畫。務使招集人夫以後。仍官為鈐束。勿至散而  
無紀。轉貽後患。並如何杜絕夷人勾結。均當於立法之初。嚴  
定章程。確有把握。方為妥善。至開採升科等事。著俟招募得  
有頭緒。再行籌辦。該夷占居各處。始自何年。並內地民人。有



無潛通煽誘等情。仍著嚴密訪查。據實具奏。將此由五百里各諭令知之。○以廣西按察使李閑為布政使。候補按察使劉長佑為廣西按察使。○庚辰。諭內閣。官文奏製造火器。請由廣東派撥兵丁前往製辦等語。噴筒火箭等物。為行軍所必需。廣東駐防旗兵。精於製造。著准其由該督行文廣州將軍。於駐防兵丁內。擇其精於製造者。派撥六七名。即委驍騎校賈穆管帶前赴湖北。以便製辦。○又諭。官文。胡林翼奏。楚軍赴皖。攻克石牌偽城一摺。安徽石牌鎮地方。逆眾麇集。修造堅城。意圖久踞。與太湖城內之賊援應。經官文等飭副都統多隆阿。督率馬步兵勇。於八月二十八日。馳抵石牌。分路

進攻。拆毀木城。越濠施放噴筒火箭。該逆驚覺。開礮正值攻城喫緊之際。潛山安慶賊匪分股來援。當派黑龍江馬隊迎勦。兩路賊援均各敗退。我軍一擁而進。該逆仍敢抗拒。各勇奮不顧身。斬毀礮眼而入偽城內。火發賊眾大亂。我軍痛殺其開城逃竄者。亦經迎頭截擊。共斃賊數千餘名。生擒四十七名。內有廣西老賊頭目霍天燕。石廷玉二名。訊明正法。奪獲大礮。擡槍。贏馬。旗幟。刀矛無數。此次援皖。楚軍攻拔石牌偽城。斬馘無遺。盡殲醜類。實足以寒賊膽而快人心。著官文等。仍飭各軍乘此聲威。克復太湖縣城。節節進勦。以靖逆氛。○諭軍機大臣等。本日彭蘊章等呈遞僧格林沁寄惠親王

等信一函。據稱本月十一日大沽海口見有三桅夷船一隻。向北行駛。十二日仍在攔江沙外停泊。不知何國船隻。如係俄夷。即派員告以如有應行進京事件。當由庫倫行走。此地因與暎拂二國接仗。即文書照會。不敢接收。看其如何答覆。再行覈辦等語。此次夷船在攔江沙外停泊。如敢闖入大沽海口。毀我防具。無論何國。即行開礮轟擊。如係俄國船隻。令其前赴北塘投遞文書。即可援照暎夷之例辦理。但不准其兵船入口。如有文書照會。可派員接收。或該夷有寄伊格那提業幅信件。亦可代為轉遞。本年三月。肅順等與前次俄國使臣丕業羅幅斯奇議准。如有人到津。先期照會中國。由北

塘進京。既有此議。自未便攔阻。致令生疑。該夷使如欲進京。不准多帶從人。以免騷擾驛傳。若祇差一二人進京遞信。即妥為護送。仍須奏明候旨遵行。將此諭令知之。○又諭。前據有鳳奏曹澍鍾現丁母憂。業經降旨照軍營例賞假百日。令赴四川寓所經理喪事。廣西巡撫著祥奎前往署理。曹澍鍾百日後仍回廣西署理巡撫矣。本日曹澍鍾奏聞訃丁憂。請簡放巡撫。俾得離任守制等語。現在逆匪攻撲廣西省城。軍務正當喫緊。祥奎尚未具奏啟程。道路梗阻。恐難即赴署任。且係生手。於現辦軍情。未必熟悉。曹澍鍾著暫留廣西署理巡撫。妥籌戰守事宜。俟祥奎到省。並桂林解圍之後。軍務稍

鬆再行回川經理喪事。以重職守。將此由六百里諭令知之。  
○協辦大學士湖廣總督官文奏。遵議曾國藩入川之軍。可  
以從緩。擬俟南省撤回各營。分路進攻。皖逆得旨。俟援楚兵  
回。速定征皖機宜。○四川松潘鎮總兵官瑞琳因病解任。以  
江南河標中軍副將聯昌為四川松潘鎮總兵官。○以河南  
商水縣勦賊出力。賞遊擊王崑亭守備吳鳳桂。李明模等花  
翎。把總王樹標等藍翎。察哈爾總管那木濟勒多爾濟。巴圖  
魯名號。餘加銜升敘有差。○以赴援廣西省城勦賊出力。予  
參將蕭榮芳等升敘有差。○辛巳諭內閣。前因記名水師總  
兵人員。將次用竣。降旨令兩江。閩浙。兩廣總督。於各該省遴

員保奏。現在簡放無人。著該督等仍遵前旨。迅速保奏。送部  
引見。候旨簡放。毋稍遲延。○諭軍機大臣等。傅振邦奏。逆捻  
糾眾分竄。請飭東豫兩省調兵扼截。並關保等軍迎前進。劄  
一摺。捻首孫葵心等。在岳家集糾聚黨與。分起至永城以西  
之鄴陽城。會齊出竄。已繞迤西之青里。棠林等集。至張家大  
屯。唐家寨一帶。該處地界蕭碭之間。恐由豐縣魚臺窺伺濟  
甯。其永城西南。復另有騎馬賊千餘。勢欲向北而趨。經傅振  
邦飭博崇武。黃良楷等。由豐碭前進。李恆清。由徐州北發。均  
令抄出賊前。相機扼擊。其富新等所帶各隊。亦令視賊所向。  
跟躡追勦。以成夾攻之勢。該提督並力疾親赴北路策應。所

籌均尚周妥。現在白旗股匪。是否西竄。抑即在永城西南。雖尚無確信。而豐碭等處。賊已蔓延。未可令其闌入山東邊界。雖有德楞額。郝上庠兩軍。扼賊來路。曹單一帶。尚屬空虛。著崇恩激勵民團。齊心守禦。與官軍聲勢聯絡。並著郝上庠探賊所向。出境迎擊。如該匪逼近東境。德楞額亦即迎頭攻勦。至關保所部馬步隊。合之豫省防兵。計數亦有七八千人。著瑛榮飭所屬帶兵官。扼要嚴防。並著關保親督承惠等。迎前進劄。就近截其西路。總其四面兜勦。逼賊回巢。乘機痛洗。毋令紛竄。其苗練一軍。即著傅振邦催令進攻各圩。牽賊回顧。並調度各軍。奮力迎擊。堵其北竄。勿稍大意。將此由六百里

各諭令知之。○調廣東碭石鎮總兵官林向榮。為福建臺灣鎮總兵官。○予安徽陣亡外委殷廷璽。祭葬世職。○壬午。遣官祭

歷代帝王廟。○大考翰林院詹事府各官於正大光明殿。○諭內閣。駱秉章奏。知縣庇護門丁。委員聽縱。不行提解一摺。湖南甯鄉縣知縣耿維中。於門丁被控賄買頂兇。贓逾千貫。重案。經該府提訊。並不遵解。嗣經委員往提。又復以自行投到。詭詞曲縱。實屬有心庇護。卸任宜章縣知縣馮晟。委提此案。並不將該門丁親自解省。輒聽耿維中支飾之詞。徑自回省。迨該府飭令再提。又敢抗不前往。並飾詞諉咎。耿維中馮

晟均著先行交部議處仍著駱秉章勒限提取全案人證解  
省嚴審儻該縣仍前庇護及訊出丁役串賄頂兇有知情故  
縱情弊即行嚴叅懲辦○又諭周天受奏分別懲辦營員等  
語甯國營帶勇都司陳綱前因捏報傷亡勇數浮領賞卹銀  
兩經晏端書奏叅革職留營戴罪勦賊茲經周天受飭赴黃  
華嶺防勦復查有虛勇吞餉情弊本應即行正法業經病故  
著毋庸議其隨同帶勇之儘先千總趙步陞儘先把總徐金  
鴻陳祖訓於陳綱虛報勇數知情不舉亦有應得之咎趙步  
陞著註銷儘先千總徐金鴻陳祖訓均著註銷儘先把總逐  
令各回本籍陳祖訓先事脫逃尤屬目無法紀著即通行嚴

緝就地正法以肅戎行○兵部以武會試中額請得旨滿洲  
蒙古取中一名漢軍取中二名奉天取中一名直隸取中十  
名河南取中五名山東取中四名山西取中二名湖北取中  
一名湖南取中一名四川取中二名陝甘取中一名廣東取  
中一名廣西取中一名福建取中一名浙江取中二名江西  
取中一名○癸未諭內閣前據給事中李培祐奏翰林院五  
經博士孟廣均於咸豐四年在高唐軍營捐輸穀米三千石  
經勝保奏請賞戴藍翎並賞加主事銜迄今尚未繳清又與  
本省官吏交結徇庇匪徒干預公事本族訟案不候官辦私  
行出票傳人訊斷等語當令崇恩確切查明具奏茲據奏稱

該博士所捐米穀實欠繳七百五十石。檢查案卷並無被控實據。該博士因有奉發鈐記。每遇該族細故。即為理論。未結者仍送官審斷。尚無任意營私之事。惟因辦理團練。不時赴縣謁見。遇事好為議論。被叅各款。事非無因等語。五經博士孟廣均。以在籍紳士。因團練出入衙門。雖查無營私劣蹟。究屬不知謹飭。至其捐輸米石。已邀獎勵。迄今數年之久。尚未繳清。尤屬非是。孟廣均著先行交部議處。並將主事職銜賞戴藍翎之案。一併撤銷。俟繳足時。再由該撫奏明辦理。○諭軍機大臣等。景瀄奏。俄夷勘界先已派員守候。並籌辦地方情形一摺。吉林距烏蘇里口三千餘里。斷非該夷所應到。俄

酋木哩斐岳幅。如至烏蘇里地方。景瀄亦未便前往與之見面。即飭在彼守候之署副都統富尼揚阿。協領祿昌。向其詳細開導。毋得遷延了事。致貽後患。夷目奇薩羅幅。不肯收回人船。語言驕橫。並拒阻赫哲。不准驅使。及遞送公文。復在烏蘇里迤東之伯力地方。聚集千餘人。備有軍械食糧。顯有尋釁之意。狂悖已極。斷非口舌所能折服。該將軍前已令攬頭招募人夫。保護山場。並擬揀派丁壯數百名。於明春變裝前往綏芬一帶。以巡海捕牲為名。借助聲勢。布置尚為周妥。富尼揚阿等守候該夷。僮木哩斐岳幅到後。情詞恭順。撤回人船。自可暫事羈縻。設敢恃眾侵占吉林地界。則是該夷自起

釁端。該將軍總以該處居民不容侵占。地方官未便彈壓為詞。以為將來轉圜地步。一面激勵城鄉團練。嚴密設防。切不可先行開仗。亦毋任該夷肆意蔓延。將此由五百里諭令知之。○賞已革直隸總督譚廷襄。五品頂帶。往直隸大順廣一帶。幫辦團練。○甲申。

上幸靜明園。○諭內閣。慶端等奏。勦辦甯洋土匪。擒獲股首。焚燬賊巢。全境肅清一摺。福建甯洋土匪胡熊。勾結黨與。疊出滋擾。屢經官軍勦擊。猶敢竄踞山寨。負嵎抗拒。經署延建邵道英樸督飭員弁。四面環攻。將該逆首用礮擊傷。旋有賊目陳情。將逆首胡熊捆送。並帶男婦幼孩八十餘名。到營投誠。

該督等已飭該署道。即將逆首胡熊。凌遲處死。以彰國法。而快人心。其投誠之陳情等。如訊係真心向化。即行免罪。妥為安插。現在上游各股土匪。或已就撫。或經殲滅。全境漸就肅清。辦理尚為妥速。所有節次在事出力文武員弁兵勇。著准其查明請獎。以示鼓勵。○又諭。前因張亮基奏。叅貴州署畢節縣知縣周芾。聲名狼籍。當降旨將該員革職。交該督提訊。茲據蔣霽遠奏稱。該員平日居官。不洽輿情。復於審辦已革武生劉彥芳人命重案。未能究出實情。率行定擬。請將該員革職。提究等語。周芾業經革職。所有劉彥芳等致斃兩命一案。著蔣霽遠俟雲南結案後。即提該革員到省。并傳集人證。

訊明嚴辦。以肅官方。○諭軍機大臣等。本日據僧格林沁等奏。接收俄夷照會信函一摺。俄夷既恐進京往返耽延。有需時日。又因北塘海面風浪。難以久停。該大臣等已與約定。暫在北塘停泊。聽候伊格那提業幅回信到時。即便開行。所有該夷交來之駐京俄夷信函四件。已由軍機處轉交理藩院。付該夷收領。一俟取到伊格那提業幅回信。即由軍機處遞交該大臣行營。令委員等交付該夷。飭令迅速開行。至俄夷照會內有物件幾匣。同公文轉送之語。本日該大臣等咨文軍機處文內。並無此件。並著查明辦理。將此由五百里諭令知之。○又諭勝保奏。籌攻懷遠。援應東路各事宜。並懇恩回

京穿孝各一摺。逆匪疊受懲創。跼伏懷遠老巢。勝保派副都統穆騰阿等。水陸進攻。並籌度東西兩路情形。飭令都司余通海等。帶領礮船。駛赴三河等處。策應布置。尚為周密。至所稱撥新到馬隊二百名。及馬勇一百名。派赴桃源屯。亦為兼顧東路起見。惟兵分則勢單。難期得力。著於所派馬勇外。另撥步隊相輔。飭赴桃源。其馬隊二百名。毋庸派往。留為攻勦懷遠之用。至該大臣以痛母成疾。籲懇暫准回京穿孝。情詞哀切。具見至性。惟此時皖省賊勢猖獗。該大臣總統全軍。責任至重。傅振邦雖係幫辦軍務。業已專顧北路。斷難兼統全軍。其餘如穆騰阿。張得勝等。祇能分路帶兵。聽候調度。實



無人能暫攝統帥之任。使勝保北行。而軍情渙散。貽誤非輕。况李世忠等投誠未久。恐非他人所能駕馭。勝保著仍遵前旨。暫留軍營。墨經從戎。速清皖境。俟軍務稍緩。接替有人。再請回京穿孝。該大臣惟當以移孝作忠之義。勉自策勵。勿負厚望。將此由六百里諭令知之。○欽差大臣僧格林沁等奏。請將調任鹽運使崇厚。暫緩交卸。留辦團練。從之。○予安徽因公淹斃知府倪元灝。祭葬卹廕。遇賊被戕。知縣何桂楫。祭葬世職。○乙酉。諭內閣。勞崇光奏。官軍克復廳城。一摺。據稱賊匪分擾連山廳境。署同知韓鳳翔。帶勇馳赴上吉。抵禦該匪。由天堂嶺。闖入廳城。該署同知退守金坑山。捐貲募勇。隨

同副將恆通。疊次進攻。將廳城克復。辦理尚屬迅速。署連山廳同知韓鳳翔。雖隨同克復。究有失守處分。若竟予免議。不足示懲。著改為革職留任。在事出力官紳兵練。准其擇尤保奏。○又諭。勞崇光奏。粵東西路兵勇克復開建。懷集兩城。一摺。廣西懷集縣城。於咸豐七年七月間。被匪竄陷。十一月間。與懷集毗連之廣東開建縣城。相繼失守。懷集以獅子背為門戶。開建以良心寨為屏蔽。該逆悉力踞守。並分股竄擾廣甯等處。本年六月。廣甯縣知縣沙翊清等。將獅子背賊巢攻破。乘勝進攻古水。中塘。草湖等處。沿途巢窟。悉被平毀。遂於十七日。將懷集縣城克復。開建之良心寨。亦經署肇慶府知

府劉式恕等購覓內應分道進兵於六月十三日攻拔進逼  
狼嶺遂抵南豐開建縣城即於十九日克復該逆負隅自固  
兩載有餘官軍疊次接仗卒能克復堅城所有在事出力員  
弁兵練著勞崇光查明保奏仍著嚴拏首匪陳金缸等務獲  
並堵勒零匪毋任回竄○又諭勞崇光奏賊匪竄陷樂昌縣  
城經官軍進勦克復一摺本年二月間逆匪由湖南桂陽竄  
擾廣東樂昌縣境署樂昌縣知縣許延毅等督率練勇分投  
抵禦因賊眾兵單賊匪乘勢闖入經廣州府知府吳昌壽前  
往應援署總兵勒福帶兵會勦連獲勝仗賊勢已感二十三  
日復派兵勇直撲賊營將更寮望樓縱火焚燒槍箭齊施該

匪大敗各勇乘勢攻入當將縣城克復辦理尚為妥速所有  
在事員弁兵勇著准其擇尤請獎以示鼓勵署樂昌縣知縣  
候補同知許延毅樂昌縣典史婁禹甸署樂昌城守汛千總  
南韶連鎮標左營把總蔡有芳雖經隨同大軍克復縣城惟  
失守城池咎有應得功過不足相抵著一併革職仍責令隨  
營效力以觀後效○又諭蔣壽遠奏回匪竄撲普安經官兵  
擊退一摺貴州普安廳於本年五月間被回匪竄擾經蔣壽  
遠派委知府胡霖澍等帶兵往勦該匪擁眾猝至攻撲營盤  
官軍連日夾擊該匪傾巢而至並由劉官坐竄撲普安廳城  
總兵金剛保督率文武登陴守禦把總陳國奉立斃紅衣賊

目一名。兵練乘勢衝殺。賊退城外之觀音山。金剛保復。令遊擊鄧逢霖乘夜襲營。復暗出奇兵。會合團練。從後抄擊。賊眾驚潰。由大坡鋪逃逸。此次回匪攻撲普安廳城。經兵練竭力守禦。會同擊退。辦理尚為安速。所有陣亡之弁兵練勇。並著查明彙案請卹。○諭軍機大臣等。前因楚南賊匪圖竄川省。諭令駱秉章。如探明賊有入黔消息。即調田興恕一軍。由武岡至綏甯靖州一路。力圖扼截。本日據蔣霽遠奏。湖南之賊。雖皆遁入廣西。而由黔亦可入川。急應豫籌防堵。况鎮遠思州等府廳苗教各匪。又復蠢動。請飭田興恕飛速回黔助剿。等語。田興恕一軍。甚為得力。該省現在賊勢猖獗。著駱秉章

即飭該副將帶同原隊兵練。迅速赴黔。仍由黎平一帶分道進剿。以免蔓延。至黎平軍中缺餉已久。省庫空虛。無從籌解。所有湖南省欠解黔省各款餉銀。並著駱秉章迅速籌撥。以資接濟。將此由六百里諭令知之。○又諭勞崇光奏前借紳士銀兩。請於續徵關稅內撥還等語。粵東前因軍餉緊要。經黃宗漢飭令紳士伍崇曜代借銀三十二萬兩。應用現屆應還期限。著照該督所請。俟粵海關稅續行徵有成數。陸續給還。以符原議。前據桂良花沙納奏。該大臣等在上海時。據黃仲奮稟稱。葉名琛在總督任內。有銀二百萬兩。交與伍崇曜收存。嗣聞此項銀兩。係存於志誠信銀號。有葉名琛家丁二

人知悉。經桂良花沙納函致畢承昭。囑其密查。此信係由吳健彰交火輪船遞粵。至今未有回信。此時畢承昭如尚未離粵。即著勞崇光詢問該員。接到桂良等信函。何以未覆。並另派委員密行查訪。葉名琛究有存銀若干。是否在志誠信銀號。據實覆奏。毋令伍崇曜等知悉。致有欺隱。將此由五百里諭令知之。○以貴州平越等處勦賊出力。賞五品頂帶陳銘勳。四品頂帶花翎。縣丞熊錫齡等。藍翎。餘升敘有差。○以勦賊不力。革貴州知府胡霖澍。千總薛明訓職。○予廣東陣亡外委王兆麟。黃立綬。祭葬世職。附生虞輔元。虞亦簡。賞卹如例。○丙戌。諭內閣。都察院奏。江西監生余震龍等。以團練紳

民殉義。並合州出力捐貲。懇請旌獎等詞。赴該衙門呈訴。據稱。江西義甯州。自咸豐二年。辦理團練。捐貲助餉。殺賊立功。經該州詳報。請增廣學額。並將殉難士民請卹。因書吏延閣。未蒙辦理。案關團練要務。必應切實根究。著惲光宸即將所控各情。確切查明。如果書吏延閣。著即嚴行懲辦。並將增廣學額。及殉難各士民。分別具奏。以慰忠魂。而勵眾志。○又諭。戶部請將報部候撥銀兩。擅自動用之巡撫。藩司。議處等語。河南清查提解司庫銀十三萬餘兩。業經該省造入撥冊。自應聽候部撥。乃該撫等。率行於軍需項下。動用銀十一萬餘兩。並未先行奏明。實與定例不符。著該部查明河南巡撫。並

布政使各職名。照例議處。其動用銀兩。仍著儘數提回歸款。內除撥解東三省俸餉外。下餘銀兩。著專款存儲。聽候部撥。不得擅行動用。以重庫項。○又諭樂斌奏。查閱陝西提標各屬營伍事竣。分別獎劾一摺。陝西護靜甯協都司靖遠營千總易騰甲。署提標中營守備靜甯協營千總朱殿雄。署固原城守營守備西安州汛千總馬兆麒。署提標後營千總西安城守營千總牛玉林。材技較優。訓練得力。均著以守備升用。以示鼓勵。肅州鎮靖逆營遊擊張國鏡。年力已衰。著即勒令休致。○科布多幫辦大臣富呢雅杭阿。緣事解任。賞內閣侍讀學士錫霖。頭等侍衛。為科布多幫辦大臣。

大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之二百九十四



